



ECONOMIA

Canche le mëis dōra massa dî por le tacuin

L'economia de Südtirol mostra sō chësc ann dōt adōm de bugn dac, scrî l'Istitut por la Promozium di Lauranc AFI/IPL te so barometer d'altonn. Por trōc lauranc ésera impō ciamō dōra: sides da rové ala fin dl mëis co da se mëte ia valch

Rodunt chisc dis á l'Istitut por la Promozium di Lauranc AFI (Arbeitsförderungsinstitut) de Südtirol mené fora so barometer d'altonn, olache al tira n prēm bilanz provisor por l'economia de Südtirol y la situaziun di lauranc dependēnc. An podess dí che al é n barometer da dōes cires. Na buna cira él por l'economia, olache l'AFI scrî: »Le bilanz provisor 2024 dla economia de Südtirol é dōt adōm plü co a scüsa. Le marcé dl'ocupaziun resta inant sterch y é tres ciamō bun da cherié posé de laur nüs. Chisc dac é a prōma odüda daldōt positifs, mo an pó ince i lí te na manira critica, deache cun le nivel bas de chersciüda economica che an á atualmēter, dijai fora n smendrimēnt dla produtivitè complessiva«. De bunes zifres él dal turism, che á les premisses por despasse ince chësc ann n record de pernotamēnc, do che an á albü da jená cina agost n plus dl 2,2%. Les esportaziuns crësc ince cotan, cun n plus dl 12%, deperpo che les importaziuns mostra sō na picia flesciun dl 0,9%, olache l'AFI vèiga n segnal de na domanda bassa do bëgns y na dinamica debla dl comerz al ingros de Südtirol.

**Lauranc:
n otimism ciamō spau**

Por ci che reverda le svilup economic de Südtirol, á i lauranc dependēnc aspetatives lisiermēter otimistiches. Ai s'aspeta che la dejocupaziun vais

tres ciamō zoruch y ai ne sint feter daldōt nia le prigo da perde le laur. Les porsones che ó mudé laur y chir n'ocupaziun dl medem nivel, á de bones prospetives da la ciafé, ince sce i liví n'è nia tan alc co chi che an á atira do la pandemia, dij l'AFI.

**Le 52% mina da se mëte ia val',
le 48% arata de no**

Le maiú crüze án por les finznes de trōpes families, olache al trōc mëss trá le ciol. Le 40% dles porsones intervistades dal AFI dij che ares stēnta da rové ala fin dl mëis; i scioldi ne tleca nia: por le 7% él »dër rî« da rové ala fin dl mëis, por le 33% él »rî«. Chi che s'un sint deplü é dantadōt i lauranc precars y chi cun na cualificá bassa. Por ci che reverda la capacitè da sparagné ti 12 mëisc che vègn, n'è la situaziun nia trōp atramēter: al é de un n vers le 52% di intervistá che mina da sciafié da se mëte val' scioldi sōn na pert; al é indere ince le 48% che s'la vèiga y mina che ara ne vais nia. Ince chiló él i lauranc precars y püch cualificá che s'un sint deplü.

Le presidēt dl AFI Andreas Dorigoni á dōt adōm na vijjiun lisiermēter otimistica por le dagni, l'assessuria provinciala por le laur Magdalena Amhof tol ca le dat dles porsones che stēnta por recordé le bilanz provincial 2025 prevèiga danter l'ater 450 miliuns por i contrac coletifs tl publich y n aumēt dles ponsiuns minimes.

PABLO



Tēmps de ciarestia por le porcel dl sparagn: le 48% di lauranc dependēnc se tēm che ai ne sciafies da se mëte ia nia ti proscims 12 mëisc, dij l'AFI de Südtirol.

Foto: Freepik